


TEZAU LITURGIC
21 IUNIE

SLUJBA
SF. CUVIOS-
MĂRTURISITOR
GHEORGHE
LAVROV
DE LA DANILOV



MOSCOVA, 2000



Служба

преподобноисповеднику

Георгию Даниловскому

На Господи возвах

Стихиры, глас 2. под. «Егда от древа:»

Верою и любовью истинною от младенства мира отреклся еси, преподобне, и, радуясь последовал еси распеншемуся Христу, образ монашеский приим и чистоту душевную и телесную стяжав. Сего ради благодатию любви и разумения спасению притекающих к тебе послужил еси; не остави и ныне требующих помощи твоея.

Словом души управляя, любовь же семена спасительная в них влагая, Георгие преподобне, плод сторичный пожал еси; сей же Владыце твоему приносиши, радуясь, Емуже ныне предстоя, помяни чад твоих, присно чтущих тя.

Егда во изгнаниих горьких изаточениих теснейших мучитель безбожный суровством тя заключи, сия вся претерпел еси, радуясь духом, отче, райское селение во уме обнося, егоже ныне благолепие видети воистинну сподобился

еси, Георгие блаженне, болезней воздаяние приемля. Таможе не забуди сущих на земли чад твоих.

Слава, глас 4:

Ни глад, ни беда, ни изгнание горькое, ни живот, ниже смерть, любви Сотворшаго тя разлучити возмогоша, исповедниче, темже Царство Небесное наследова, сладость неизживающую, и веселие, не имущее конца. Но испроси и нам, чтущим тя, очищение, и мир, и велию милость.

И ныне:

Иже Тебе ради Богоотец пророк Давид:

На стиховне:

Стихиры, глас 1. Под. «Небесных чинов радование»

Отче Георгие, красных жития отверглся еси, радости и веселия ангельскаго сподобляясь, и душевною крепостию скорби мира сего нивчтоже вменив, терпеливнейше течение живота твоего совершил еси. Христа моли даровати нам мир и велию милость.

Стих: Честна пред Господем смерть преподобных Его.

Отче Георгие, Богу содействующи, яко иерей и пастырь словесных овец, плод сторицествующий Владыце, души привел еси спасенных словом твоим, слезами же и болезнями сердечными. И ныне молися даровати душам нашим мир и велию милость.

Стих: Священники Твои облекутся в правду, и преподобнии Твои возрадуются.

Отче Георгие, изгнания еже за Христа претерпев и от земли преставився, к Небеси востекл еси и в селениих райских жити сподобился еси. Темже за нымолися даровати душам нашим мир и велию милость.

Слава, глас 8:

Павла божественнаго слово исполняя, во изгнаниих терпеливно, преподобне Георгие, жизнь скончалеси, в нуждах и скорбех, от всюду утесняемь, и прехождения творя, не имея где главу подклонити, таже без печальное и неизменное от Бога селение и наслаждение обрел еси. Егоже моли, блаженне, даровати нам мир и велию милость

И ныне: Безвестная Дево:

Тропарь, глас 2

Издетска монашескаго жития возжелал еси, преподобне отче Георгие, им желюбовь Христову стяжав, пастырь добрый многим людем явился еси, последи же и изгнания претерпев, венцем исповедничества украсился еси. И ныне, предстоя Престолу Святыя Троицы, непрестанно моли спасти и просветити души наша.

По 1-м стихословии, седален глас 3,

под. «Красоте девства:»

Учением словес твоих люди твоя просветил еси, изгнанием же крест исповедничества понесл еси, блаженне, темже ныне неизживаемую благодать приял еси от Света Невечерняго, Христа Спаса нашего, Егоже моли даровати нам велию милость.

Слава и ныне:

Красоте девства Твоего и пресветлой чистоте Твоей Гавриил удивився, вопияше Ти, Богородице: кую достойную похвалу принесу Ти, что же возыменую Тя, недоумеваю и ужасаюся. Темже, яко повелен бых, вопию Ти: радуйся, Благодатная.

По 2-м стихословии, седален глас 4,

под. «Светлую Воскресения проповедь:»

Священства одежду светлейшу подвигом исповедничества соделал еси, преподобне, на Небеса вселився, Георгие, и Егоже возжелал еси всем сердцем твоим обрета. Темже твою всесвященную память славим и взываем: помяни нас, со дерзновением Богу предстояй.

Слава и ныне:

Многими прегрешеньми аз, блудный, ум помрачив, Твоему крепкому заступлению вопию, Богородице: души моя зеницы просвети и покаяния светлую зарю возсияй ми, и во оружие света облецы мя, Богородительнице Чистая.

По полиелеи седален, глас 8, под. «Егда снизшед:»

На земли яко странник и пришлец был еси, гонения и изгнания претерпев, попечение точию о любви Христове имея, юже стяжал еси обильно, Георгие преподобне, молися ко Господу о спасении душ наших.

Слава и ныне:

Радуйся, Врата Царя славы, Яже Вышний един пройде и Едины запечатаны сохрани, во спасение душ наших.

Прокимен: Честна пред Господем:

Евангелие: от Матфея, 43

Стихира, глас 6:

Преподобне отче Георгие, ты от юности своея монашеское житие возлюбил еси, и подвизався усердно, Духа Святаго стяжал еси, и пастырь словесным овцам был еси, во еже ко спасению их наставляя. Последи же скорби, изгнания и болезни претерпел еси, имиже в Царство Небесное вшел еси, идеже предстоя Христу и неизреченным утешением наслаждаяся, моли спастися душам нашим.

КАНОН, глас 2

Песнь 1

Ирмос: Моисейскую песнь восприимши, возопий, душе: Помощник и Покровитель бысть мне во спасение, сей мой Бог, и прославлю Его.

Припев: Преподобне отче наш Георгие, моли Бога о нас.

Отверзи ми устне, Христе Царю, воспети
угодника Твоего Георгия преподобнаго, да
молитвами своими облак разорит страстей моих.

От юности возлюбил еси монашеское житие,
преподобне, и верен был еси до смерти, в
терпении стяжав душу твою, темже приемлещи
воздаяние ныне от Христа праведнейшее.

Слава: Издетска во обитель Оптину вселився,
кротость, и терпение, и смирение стяжал еси,
преподобне, имиже душу к приятию дара любви
Христовы уготовал еси.

И ныне: От враг видимых и невидимых избави,
молимся, к Тебе прибегающих, Богородице, и
разори всяк совет борющихся нас, молитвами
Твоими.

Песнь 3

Ирмос: Утверди мя, Господи Боже мой, да не
похвалится враг мой о мне, Ты бо еси, Господи,
утверждение мое, и прибежище, и сила.

Притек во обитель Оптину, духом сущих тамо
преподобных отцев напитался еси, блаженне,
возращая душу твою на пажитех спасительных,
Георгие, таже, плод возрадив, возмогл еси
ближнему помощи.

Не может град укрытися, верху горы стояй, сего ради постави тя Господь на свещнице настоятельства, и был еси пастырь добрый не иноком точию, но всем притекающим к тебе.

Слава: Настоятельствующу ти во обители Мещовстей, глад бысть на месте том; препитавал же еси алчущия люди, зря Христа в притекающих к тебе.

И ныне: Злое нападение врагов, обышедших нас, яко огонь палящее, ищущих всегда погибели нашей, Дево, росую молитв Твоих угаси.

Песнь 4

Ирмос: Пришел еси от Девы, не ходатай, ни Ангел, но Сам, Господи, воплощся, и спасл еси всего мя человека, тем зову Ти: слава силе Твоей, Господи.

Егда попусти Господь разорение жизни Отечества нашего, тогда, Георгие, в темницу заключен был еси, идеже упование на Христа возлагая, вопиял еси: слава силе Твоей, Господи.

Раны телесныя соузником твоим обязуя, Георгие, души их благодатию Христовою, радуяся, врачевал еси, взывая: слава силе Твоей, Господи.

Слава: Помянув Господь благодеяния твоя, спасе от смерти ты и союзников твоих, Георгие блаженне, уведев же тем милость Жизнодавца, возопил еси во умилении: слава силе Твоей, Господи.

И ныне: От наития избави нас, Мати Божия, и бури, и бед, Твоими молитвами, Едина Всепетая, да зовем во умилении: слава силе Твоей, Господи.

Песнь 5

Ирмос: От ноци поем Тя, Христе Боже, яко благоволением Отчим Себе во истощание положил еси нашего ради спасения.

Заключену сущу ти в темнице, Георгие исповедниче, всем в скорбех и болезнях тамо бывшим помогал еси, ныне же мзду приемлещи от Христа воздаяния.

Утесняемому сущу внешнему человеку, во узах, Георгие, утешение духовное и обновление от Христа во внутреннем человеце, преподобне, радуясь приял еси.

Слава: Якоже великий во Апостолах, всем был еси вся, Георгие, в заточении горцем сущим раны телесныя и душевныя исцеляя врачеванием Христовым, блаженне.

И ныне: Молитвеннице неложная, упование христиан, Обрадованная, прими мольбы от нас, прилежно призывающих и молящихся Тебе.

Песнь 6

Ирмос: Бездна согрешений обыде мя последняя, но яко пророка Иону, Господи, возведи из исления живот мой.

Волею Господнею изшедшу ти из темницы, преподобне, во обитель Данилову вселился еси, Георгие, о нейже ныне молишися Христу Вседержителю.

Обрет, яко пристанище временное, обитель Данилову, славне Георгие, ныне же в непреходящих селениях купно с князем Даниилом на Небесех радуяся живещи.

Слава: Был еси, Георгие, притекающим к тебе во обитель Данилову путевождь ко спасению, егоже ныне улучив, молишися о нас, блаженне.

И ныне: Целомудрия Ходатаица призывающим Тя ныне явися, и от всяких избави напастей и бед молитвами Твоими, Богоневесто.

Песнь 7

Ирмос: Да преславное рождество Твое, Христе, еже от Девы, прообразиши яве, неопалимы в пещи отроки сохранил еси, песньми поющия Ти: Боже, благословен еси.

Никакоже забывал еси чад твоих, Георгие преподобне, понуждаемь пещися о них любовью Христовою, Емуже предстоя ныне, зовещи: Боже, благословен еси.

Любовь Христову в сердце твоём стяжав, чада твоя Пастыреначальнику привел еси, Георгие блаженне, Емуже о нас моляся, взываещи: Боже, благословен еси.

Слава: Отдели тя телесне от паствы твоея изгнание горькое, но духом не возмогл еси разлучитися любящих тя, Георгие славне, во еже купно с ними звати Христу: Боже, благословен еси.

И ныне: Покажи скорое Твое заступление, Мати Божия, призываем Тя от сердца, со слезами припадающе: скорби премени и обстояния разреши рабом Твоим, да поем: Боже, благословен еси.

Песнь 8

Ирмос: Древле оросившаго еврейския отроки в пламени и опалившаго халдеи преславно в нем, воспоем Господа, глаголюще: благословите и превозносите Его во вся веки.

Твердым помыслом гонения, скорби и болезни понесл еси, славне, имиже венец терпения приял еси, Георгие, ныне же, воздаянием некрадомым наслаждаяся, зовещи: Господа пойте и превозносите во вся веки.

Тесным путем шествуя, преподобне, пажитей достигл еси, блаженне, рая, небес ширших, идеже веселяся, зываещи со святыми: Господа пойте и превозносите во вся веки.

Слава: Ни скорбь, ни болезнь, ни изгнание разлучити тя не возмогоша от любве Христовы, Георгие исповедниче, в нейже ныне на Небесех живещи, вопия: Господа пойте и превозносите во вся веки.

И ныне: Да имя Твое, Богородице, на земли славословится, Иже бо из Тебе возсияв, грешником прибежище Тя дарова, Тобою бо всякое дыхание Господа поет и превозносит во вся веки.

Песнь 9

Ирмос: Тебе, мысленную и одушевленную
лествицу, на нейже Бог наш утвердися, Еюже к
Небеси обретохом восхождение, песньми,
Богородице, величаем.

Зной земный понесл еси во изгнании твоём,
исповедниче, алчбу и жажду претерпел еси,
ныне же упасл еси тя Агнец на источницах
прохладных вод животных.

Скорбел еси сердцем твоим, преподобне, слезя о
чадах твоих и о мире всем, ныне же отъял еси
Господь от очию твоею всяку слезу, Георгие
блаженне.

Слава: Не имел еси где главы подклонити,
Георгие, егда готовляшеся отшествие твое во
Град взыскуемый, ныне же вселился еси во
обители непреемныя.

И ныне: Нам, поющим Тя, и верою славящим, и
к предстательству Твоему тепле притекающим,
подаждь с Небесе разрешение лютых и мучащих
страстей, да Тя непрестанно вернии величаем.

Светилен. Под. «Посетил ны еси:»

Посети тя Господь скорбным житием, Георгие,
имже монашество и священство твое наवरшил

еси место светло во Царствии Небеснем обрел еси, но молися и нам тамо быти, преподобне.

Слава и ныне:

Мольбы раб Твоих не презри, Всенепорочная, спасающи нас от бед и скорбей молитвами Твоими.

На хвалитех

стихиры, глас 4-й Под. «Дал еси знамение:»

Возрастил еси талант, вверенный тебе, преподобне, в терпении душу твою стяжевая, и, сеяв со слезами, в радости ныне, отче, жнеши, многосугубное утешение и покой истинно улучив. Но яко имея дерзновение ко Владыце, молися о поющих тя, Богоносе Георгие.

Монашеским житием первее, послежде и страданьми богомудренно Владыце и Создателю благоугодил еси, очищение и душевное благородие от нас истязующему; Егоже в мир пришествие исповедуя и веру тверду даже до конца соблюд, дерзновение к Нему стяжал еси, темже молися о спасении чтущих тя, преподобне Георгие.

Иже Бога злочестиво отвергшия смирением и озлоблений терпением обличил еси, истину

утверждая сим преподобне, темже был еси Христова Царствия наследник, и радости неизреченныя, и присносущнаго сияния, егоже улучшить и нам Владыце молися, блаженне Георгие.

Слава, глас 6:

Весь от юности Господеви последовав, пристрастие и любовь мирскую оставил еси, славне, духом же горя, в монашестве богоподобное смирение стяжал еси и наставник притекающих к тебе, отче, был еси, послежде во изгнании многи скорби и болезни претерпев, венец нетленный от Христа приял еси, Егоже моли спасти и просветити души наша.

И ныне: Богородице, Ты еси Лоза истинная:

На Литургии:

Блаженны от канона, пп. 3-я и 6-я.

Прокимен: Возвеселится праведник о Господе и уповаает на Него.

Стих: Услыши, Боже, глас мой, внегда молити ми ся к Тебе.

Апостол: Рим. Зачало 99

Аллилуйя: Праведник, яко финике процветет:

Стих: Священники Твои оденуты в правду:

Евангелие: от Матфея, зачало 10

Причастен: В память вечную:

